

四庫全書

史部

欽定四庫全書

唐律疏義卷八

唐 長孫無忌等 撰

衛禁下 凡一十五條

宿衛兵仗

諸宿衛者兵仗不得遠身違者杖六十若輒離職掌加一等別處宿者又加一等主帥以上各加二等

疏義曰兵仗者謂橫刀常帶其甲稍弓箭之類有時

應執者者並不得遠身不應執帶者常自近身輒遠
身者各杖六十其職掌之處依次坐立輒離職掌加
一等合杖七十即於別處宿者又加一等合杖八十
主帥以上各加二等稱主帥以上謂隊副以上至大
將軍以下兵仗遠身杖八十輒離職掌杖九十別處
宿者杖一百是各加二等

行宮營門

諸行宮外營門次營門與宮門內同營牙帳門與殿門

同御幕門與上閣同至御所依上條

疏義曰行宮謂車駕行幸及所至安置之處外營門次營門與宮門同闢入者得徒二年內營牙帳門與殿門同闢入者得徒二年半御幕門與上閣同闢入者絞至御在所依上條合斬自餘諸犯或以闢入論及應加減者並同正宮殿之法

宮內外行夜

諸宮內外行夜若有犯法行夜主司不覺減守衛者罪

二等

疏義曰宮內外行夜並置鋪持更即是守衛者又有探更行更之人此行夜者若當探行之處有犯法者行夜主司不覺減守衛者罪二等謂上條闌入及越垣守衛不覺減二等注云守衛謂持時專當者行夜主司不覺犯法皆減此持時專當人罪二等

犯廟社禁苑罪名

諸本條無犯廟社及禁苑罪名者廟減宮一等社減廟

一等禁苑與社同

疏義曰闌入廟社及禁苑本條各有罪名其不立罪名之處謂闌入至闕未踰因入輒宿之類各隨輕重廟減宮一等社減廟一等禁苑與社同

即向廟社禁苑射及放彈投瓦石殺傷人者各以鬪殺傷論至死者加役流

疏義曰廟社及禁苑非人射及放彈投瓦石之所若有輒向射及放彈投瓦石殺傷人者各依鬪殺傷人

罪法若箭傷徒二年瞎一目徒三年之類至死者唯處加役流

卽箭至隊仗若闢仗內者絞

疏義曰駕行皆有隊仗或闢仗而行忽有人射箭至隊仗所及至闢仗內者各得絞罪

宮門等冒名守衛

問答一

諸於宮城門外若皇城門守衛以非應守衛人冒名自代及代之者各徒一年

疏義曰謂宮城門外隊仗及傍城助鋪所及朱雀等門所有守衛之處以非應守衛人員名自代若代之者各得徒一年

以應守衛人代者各杖一百京城門各減一等

疏義曰謂以當色下直非當上之人自代及代之者各杖一百京城門各減一等者謂明德等諸門非應守衛人自代從一年徒上減一等以應守衛人自代從一百杖上減一等

其在諸處守當者各又減二等餘犯應坐者各減宿衛罪三等

疏義曰其在諸處謂非皇城京城等門自餘內外捉道守鋪及別守當之處相冒代者各減京城二等以非應守衛人自代及代之者各杖八十以應守衛人自代及代之者各杖七十餘犯應坐者謂相冒代之外餘犯或兵仗遠身輒離職掌及擅配割或別驅使之類本條應坐者各減宿衛人罪三等若逃走違番

不在減例

問曰宿衛人以非應宿衛人冒名自代及代之者入宮內流三千里殿內絞若未入宮殿內事發合得何罪

答曰以非應宿衛人自代重於闌入之罪若未至職掌之處事發在宮殿內止依闌入宮殿而科如未入宮門事發律無正條宜依不應為重杖八十其在宮外諸處冒代未至職掌處從不應為輕笞四十

越州鎮戍等垣城

諸越州鎮戍城及武庫垣徒一年縣城杖九十

皆謂有門禁者

疏義曰諸州及鎮戍之所各自有城若越城及武庫

垣者各合徒一年越縣城杖九十縱無城垣籬柵亦

是注云皆謂有門禁者其州鎮戍在城內安置若不

越城直越州鎮垣者止同下文越官府廨垣之罪

越官府廨垣及坊市垣籬者杖七十侵壞者亦如之

從溝

漬內出入者與越罪同越而未過減一等餘條未過準此

疏義曰官府者百司之稱所居之處皆有廨垣坊市者謂京城及諸州縣等坊市其廨院或垣或籬輒越過者各杖七十侵謂侵地壞謂壞城及廨宇垣籬亦各同越罪故云亦如之

注從溝瀆內出入者與越罪同越而未過減一等餘條未過準此

疏義曰溝瀆者通水之渠從此渠而入出亦得越罪越而未過或在城及垣籬上或在溝瀆中間未得過

者從越州城以下各得減一等餘條未過準此者謂越皇城京城宮殿垣及關津應禁之處未過者各得減罪一等

卽州鎮關戍城及武庫等門應閉忘誤不下鍵若應開毀管鍵而開者各杖八十

疏義曰州鎮關戍城武庫各有禁門應閉皆須下鍵其忘誤不下鍵若應開毀管鍵而開者各得杖八十錯下鍵及不由鑰而開者杖六十餘門各減二等

疏義曰錯下鍵謂管鍵不相當者及不由鑰而開者
謂不用鑰而開各杖六十餘門謂縣及坊市之類官
有門禁者若應閉忘誤不由鍵應開毀管鍵而開各
杖六十錯下鍵及不由鑰而開各笞四十故云餘門
各減二等

若擅開閉者各加越罪二等即城主無故開閉者與越
罪同未得開閉者各減已開閉一等

餘條未得
開閉準此

疏義曰擅謂非時而開閉者州及鎮戍武庫門而有

非時擅開閉者加越罪二等處徒二年縣城以下擅
開閉者並加越罪二等城主無故開閉者謂州縣鎮
戍等長官主執鑰者不依法式開閉與越罪同其坊
正市令非時開閉坊市門者亦同城主之法州縣鎮
戍城門各徒一年自縣城以下悉與越罪同既主城
主無故開閉即是有故許開若有警急驛使及制勅
事速非時至州縣者城主驗實亦得依法為開又依
監門式京城每夕分街立鋪持更行夜鼓聲絕則禁

人行曉鼓聲動即聽行若公使齋文牒者聽其有婚
嫁亦聽注云須得縣牒喪病須相告赴求訪醫藥齋
本坊文牒者亦聽其應聽行者並得為開坊市門若
有警急及收掩雖州縣亦非時而開未得開閉者謂
未通人行者為未開尚得人行者為未閉各減已開
閉一等餘條謂宮殿門以下有門禁之類未得開閉
者皆準此減一等

私度關

諸私度關者徒一年越度者加一等

不由門為越

疏義曰水陸等關兩處各有門禁行人來往皆有公文謂驛使驗符券傳送據通牒軍防丁夫有總歷自餘各請過所而度若無公文私從關門過合徒一年越度者謂關不由門津不由濟而度者徒一年半

已至越所而未度者減五等

謂已到官司應禁約之處餘條未度準此

疏義曰水陸關棧兩岸皆有防禁越度之人已至官司防禁之所未得度者減越度五等合杖七十餘條

未度準此者謂城及垣籬緣邊關塞有禁約之處已至越所而未度者皆減已越罪五等若越度未過者準上條減一等之例

即被枉徒罪以上抑屈不申及使人覆訖不與理者聽於近關州縣具狀申訴所在官司即準狀申尚書省仍遞送至京若無徒以上罪而妄陳者即以其罪罪之官司抑而不送者減所訴之罪二等

疏義曰關外有人被官司枉斷徒罪以上其除免之

罪本坐雖不合徒亦同徒罪之法抑屈不申及使人覆訖不與理者文稱及者使人未覆亦聽於近關州縣具狀申訴所在官司謂近關州縣即準狀申尚書省仍遞送至京若勘無徒以上罪而妄訴者妄訴徒流還得徒流妄訴死罪還得死罪妄訴除免皆準比徒之法謂元無本罪而妄訴者若實有犯斷有出入而訴不平者不當此坐其應禁及散送並依所訴之罪準令遞之若官司抑而不送者減所訴之罪二等

謂枉得死罪官司不送合徒三年之類

不應度關

諸不應度關而給過所

取而度者亦同

若冒名請過所而度者

各徒一年

疏義曰不應度關者謂有征役番期及罪譴之類皆不合輒給過所而官司輒給及身不合度關而取過所度者若冒他人名請過所而度者各徒一年

即以過所與人及受而度者亦準此

疏義曰以所請得過所而轉與人及受他人過所而承度者亦徒一年但律文皆云度者得徒一年明知未度者不合徒坐若關司未判過所以前準越關未度各減五等之例若已判過所未出關門同未過各減一等其與過所人既因度成罪前人未度亦同減科不應給過所而給者不在減例

若家人相冒杖八十主司及關司知情各與同罪不知情者不坐即將馬越度冒度及私度者各減人二等餘

畜又減二等

家畜相冒者不坐

疏義曰家人不限良賤但一家之人相冒而度者杖八十既無名字被冒名者無罪若冒度私度越度事由家長處分家長雖不行亦獨坐家長此是家人共犯止坐尊長之例主司謂給過所曹司及關司知冒度之情各同度人之罪不知冒情主司及關司俱不坐將馬越度冒度私度各減人二等者越度杖一百冒度私度杖九十餘畜又減二等者除馬之外應請

過所者並為餘畜越度杖八十私度冒度杖七十其家畜相冒者謂毛色齒歲不同相冒並不得罪也

關津留難

諸關津度人無故留難者一日主司笞四十一日加一等罪止杖一百

疏義曰關謂判過所之處津直度人不判過所者依令各依先後而度無故留難不度者一日主司笞四十主司謂關津之司一日加一等七日罪止杖一百

此謂非公之人若軍務急速而留難不度致稽廢者
自從所稽廢重論

私度有他罪

諸私度有他罪重者主司知情以重者論不知情者依
常律

疏義曰私度者謂無過所從關門私度止徒一年或
有避死罪逃亡別犯徒以上罪是名有他罪重關司
知情者以故縱罪論各得所度人重罪不知情者依

常律謂不知罪人別犯之情者依常律不覺故縱之法

人兵度關妄度

諸領人兵度關而別人妄隨度者將領主司以關司論關司不覺減將領者罪一等知情者各依故縱法有過所者關司自依常律將領主司知情減關司故縱罪一等不知情者不坐

疏義曰準令兵馬出關者依本司連寫勅符勘度入

關者據部領兵將文帳檢入而別有人妄隨度者罪
在領兵官司故云將領主司以關司論知情與同罪
不覺減二等若知別有重罪亦依重罪科之關司不
覺者謂關司承將領者文簿不覺別人隨度者減將
領者一等謂減度者罪三等知情者各依故縱法稱
各者將領主司及關司俱得度人之罪有過所者關
司判度自依常律不減將領主司之罪若將領主司
知情減關司故縱罪一等不知情者不坐

齋禁私物度關

諸齋禁物私度關者坐贓論贓輕者從私造私有法

疏義曰禁物者謂禁兵器及諸禁物並私家不應有者私將度關各計贓數從坐贓科罪十足徒一年十足加一等罪止徒三年準贓輕者從私造私有法擅興律私有甲一領弩三張流二千里稍一張徒一年半私造者各加一等假令私將稍度關平贓直絹三十十足即從坐贓科徒二年不計稍為罪將甲一領度

關從私有法流二千里即不計贓而斷

若私家之物禁約不合度關而私度者減三等

疏義曰依關市令錦綾羅縠紬綿絹絲布犢牛尾真珠金銀鐵並不得度西邊北邊諸關及至緣邊諸州興易從錦綾以下並是私家應有若將度西邊北邊諸關計贓減坐贓罪三等其私家不應有雖未度關亦沒官私家應有之物禁約不合度關已下過所關司捉獲者其物沒官若已度關及越度被人糾獲三

分其物二分賞捉人一分入官

越度緣邊關塞

諸越度緣邊關塞者徒二年共化外人私相交易若取與者一尺徒二年半三疋加一等十五疋加役流

疏義曰緣邊關塞以隔華夷其有越度此關塞者得徒二年以馬越度準上條減人二等合徒一年餘畜又減二等杖九十但以緣邊關塞越罪故重若從關門私度人畜各與餘關罪同若共化外蕃人私相交

易謂市買博易或取蕃人之物及將物與蕃人計贓一尺徒二年半三疋加一等十五疋加役流

私與禁兵器者絞共為婚姻者流二千里未入未成者各減三等即因使私有交易者準盜論

疏義曰越度緣邊關塞將禁兵器私與化外人者絞共為婚姻者流二千里其化外人越度入境與化內交易得罪並與化內人越度交易同仍奏聽勅出入國境非公使者不合故但云越度不言私度若私度

交易得罪皆同未入者謂禁兵器未入減死三等得徒二年半未成者謂婚姻未成減流三等得徒二年因使者謂因公使入蕃蕃人因使入國私有交易者謂市買博易各計贓準盜論罪止流三千里若私與禁兵器及為婚姻律無別文得罪並同越度私與禁兵器共為婚姻之罪又準別格諸蕃人所娶得漢婦女為妻妾並不得將還蕃內又準主客式蕃客入朝於在路不得與客交雜亦不得令客與人言語州縣

官人若無事亦不得與客相見即是國內官人百姓
不得與客交關私作婚姻同上法如是蕃人入朝聽
住之者得娶妻妾若將還蕃內以違勅科之

緣邊城戍

諸緣邊城戍有外姦內入

謂非衆成
師旅者

內姦外出而候望

者不覺徒一年半主司徒一年

謂內外姦人出入
之路闕于候望者

疏義曰國境緣邊皆有城戍式遇寇盜預備不虞其
有外姦內入謂蕃人為姦或行間諜之類注云謂非

衆成師旅者依周禮五百人為旅二千五百人為師
此謂小小姦寇抄掠者若陳師旅自依擅興律連接
寇賊被遣斥候不覺賊來徒三年有內姦外出者謂
國內人為姦出向化外或荒海之畔幽險之中候望
之人不覺有姦入出合徒一年半雖非候望者但是
城戍主司不覺得徒一年謂內外姦人出入之路關
於候望者目所堪見為關謂在候望之內也

具有姦人入出力所不敵者傳告比近城戍若不速告

及告而稽留不即共捕致失姦寇者罪亦如之

疏義曰其有姦人入出所經城戍皆即捕之若力所不敵者即須傳告比近城戍令共捕逐若不速告及告而稽留不即共捕致失姦寇者並徒一年

烽候不警

諸烽候不警令寇賊犯邊及應舉烽燧而不舉應放多烽而放少烽者各徒三年

疏義曰烽候謂從緣邊置烽連於京邑烽燧相應以

備非常放烽多少具在別式候望不舉是名不警若令蕃寇犯塞外賊入邊及應舉烽燧而不舉應放多烽而放少烽者各徒三年

若放烽已訖而前烽不舉不即往告者罪亦如之以故陷敗戶口軍人城戍者絞


疏義曰依職方式放烽訖而前烽不舉者即差脚力往告之不即告亦徒三年故云亦如之以故陷敗謂從烽候不警及應舉烽燧而不舉或應放多烽而反

放少烽或放烽訖而前烽不舉不即往告等以故陷
敗戶口或是軍人及城戍者各得絞罪

即不應舉烽燧而舉若應放少烽而放多烽及繞烽二
里內輒放煙火者各徒一年

疏義曰依式望見煙塵即舉烽燧若無事故是不應
舉若應放烽少而放多烽及繞烽二里內皆不得有
煙火謂晝放煙夜放火者自不應舉烽燧而舉以下
三事各徒一年放烽多少具在式文其事隱秘不可

具引如有犯者臨時據式科斷



唐律疏義卷八

欽定四庫全書

史部
唐律疏義卷十一

詳校官侍講學士臣法式善

編修臣程嘉謨覆勘

總校官編修臣王燕緒

校對官編修臣羅修源

謄錄監生臣陳宏猷

欽定四庫全書

唐律疏義卷九

唐 長孫無忌等 撰

職制上 凡二十三條

疏義曰職制律者起自於晉名為違制律爰至高齊此名不改隋開皇改為職制律言職司法制備在此篇宮衛事了設官為次故在衛禁之下

官有員數

諸官有員數而署置過限及不應置而置

謂非奏授者

一人

杖一百三人加一等十人徒二年

疏義曰官有員數謂內外百司雜任以上在令各有員數而署置過限及不應置而置謂格令無員妄相署置注云謂非奏授者即是視六品以下及流外雜任等所司判補一人杖一百三人加一等十人徒二年若是應奏授詐而不實者從詐假法如不合置官而故刺奏授者從上書詐不實論

後人知而聽者減前人署置一等規求者為從坐被徵
須者勿論即軍務要速量事權置者不用此律

疏義曰前人署置過限及不應置而置後人知其剩
員而聽任者減初置人罪一等謂一人杖九十四人
以上杖一百七人以上徒一年十人徒一年半規求
者為從坐謂人自規求而任者為初置官從坐合杖
九十被徵須者謂被徵召而補者勿論即軍務要速
量事權置者謂行軍之所須置權官不當署置之罪

故云不用此律

貢舉非其人

諸貢舉非其人及應貢舉而不貢舉者一人徒一年二

人加一等罪止徒三年

非其人謂德行乖僻不如舉狀者若試不及第減二等率五分

得三分及第者不坐

疏義曰依令諸州歲別貢人若別勅令舉及國子諸

館年常送省者為舉人皆取方正清循名行相副若

德行無聞妄相推薦或才堪利用蔽而不舉者一人

徒一年二人加一等罪止徒三年注云非其人謂德行乖僻不如舉狀者若使名實乖違即是不如舉狀縱使試得及第亦退而獲罪如其德行無虧唯只策不及第減乖僻者罪二等率五分得三分及第者不坐謂試五得三試十得六之類所貢官人皆得免罪若貢五得二科三人之罪貢十得三科七人之罪但有一人德行乖僻不如舉狀即以乖僻科之縱有得第者多並不合共相準折

若考校課試而不以實及選官乖於舉狀以故不稱職

者減一等

負殿應附而不附及不應附而附致考有陞降者罪亦同

疏義曰考校謂内外文武官僚年終應考校功過者其課試謂貢舉之人藝業技能依令課試有數若其官司考試不以實及選官乖於所舉本狀以故不稱職者謂不習典憲任以法官明練經史授之武職之類各減貢舉非其人罪一等負殿應附不附者依令私坐每一斤為一負公罪二斤為一負各十負為一

殿校考之日負殿皆悉附狀若故違不附及不應附而附者謂蒙別勅放免或經恩降公私負殿並不在附限若犯免官以上及贓賄入已恩前獄成仍附景迹除此等罪並不合附而故附致使考校有陞降者得罪亦同謂與考校課試不實罪同亦減貢舉非其人罪一等

失者各減三等

餘條失者準此

承言不覺又減一等知而聽行

與同罪

疏義曰失者各減三等謂意在堪貢心不涉私不審德行有虧得減故罪三等自試不及第以下應附不附以上失者又各減三等餘條失者準此謂一部律內公事錯失本條無失減之文者並準此減三等承言不覺亦從貢舉以下承校試人言不覺差失從失減三等上更減一等故云又減一等知而聽行亦從貢舉以下知非其人或試不及第考校課試知其不實或選官乖狀各與同罪謂各與初試者同罪

刺史縣令私出界

諸刺史縣令折衝果毅私自出界者杖一百

經宿乃坐

疏義曰州縣有境界折衝府有地團不因公事私自出境界者杖一百注云經宿乃坐既不云經日即非百刻之限但是經宿即合此坐

在官應直不直

問答一

諸在官應直不直應宿不宿各笞二十通晝夜者笞三

十

疏義曰依令內外官應分番宿直若應直不直應宿不宿晝夜不相湏各笞二十通晝夜不直者笞三十

若點不到者一點笞十

一日之點限取二點為坐

疏義曰內外官司應點檢者或數度頻點點即不到者一點笞十注云一日之點限取二點為坐謂一日之內點檢雖多止據二點得罪限笞二十若全不來上計日以無故不上科之

問曰二日以上日別常伺曹司曹司點檢每點不到

若科無故不上即是日別常來若以累點科之罪又重於不上假有十日之內日別皆來每點不到欲科何罪

答曰八品以下頻點不到便是已發更犯合重其事累點科之如非流內之人自須當日決放初雖累點罪重點多不至徒刑計日不上初輕日多即至徒坐所以日別上者據點全不來者計日以此處斷實允刑名

官人無故不上

諸官人無故不上及當番不到

雖無官品但分番上下亦同下條準此

疏義曰官人者謂內外官人無故不上當番不到謂分番之人應上不到注云雖無官品謂但在官分番者得罪亦同官人之法下條準此者謂之官限滿不赴及官人從駕稽違及從而先還雖無官品亦同官人之法

若因暇而違者一日笞二十三日加一等過杖一百十

日加一等罪止徒一年半邊要之官加一等

疏義曰官人以下雜任以上因給暇而故違並一日
笞二十三日加一等二十五日合杖一百三十五日
徒一年四十五日徒一年半邊要之官謂在緣邊要
重之所無故不止以下各加罪一等

之官限滿

諸之官限滿不赴者一日笞十十日加一等罪止徒一
年即代到不還減二等

疏義曰依令之官各有裝束程限限滿不赴一日笞
十十日加一等罪止徒一年其替人已到淹留不還
準不赴任之程減罪二等其有田苗者依令聽待收
田訖發遣無田苗者依限頒還

官人從駕稽違

諸官人從駕稽違及從而先還者笞四十三日加一等
過杖一百十日加一等罪止徒二年侍臣加一等

疏義曰官人謂百官應從駕者流外以下應從人亦

同官人之罪其書吏書僮之類差逐官人者不在此
限其有稽違不到及從而先還者雖不滿日笞四十
三日加一等過杖一百十日加一等罪止徒二年侍
臣謂中書門下省五品以上依令應侍從者加罪一
等

大祀不預申期

諸大祀不預申期及不頒所司者杖六十以故廢事者
徒二年

疏義曰依令大祀謂天地宗廟神州等為大祀或車
駕自行或三公行事齋官皆散齋之日平明集省受
誓誠二十日以前所司預申祠部祠部頒告諸司其
不預申期及不頒下所司者杖六十即雖申及頒下
事不周悉所坐亦同以故廢祠祀事者所由官司徒
二年應連坐者各依公坐法節級得罪

牲牢玉帛之屬不如法杖七十闕數者杖一百全闕者

徒一年

全闕謂
一坐

疏義曰牲謂牛羊豕牢者牲之體王謂蒼璧祀天璜
琮祭地五方上帝各依方色帛謂幣帛稱之屬者謂
黍稷以下不依禮令之法一事有違合杖七十一事
闕少合杖一百坐全闕合徒一年其本是中小祀雖
從大祀受祭若有少闕各依中小祀遞減之法闕坐
更多罪不過此餘祀闕坐皆準此

即入散齋不宿正寢者一宿笞五十致齋不宿本司者
一宿杖九十一宿各加一等中小祀遞減二

凡言祀者
祭享同餘

條中小
祀準此

疏義曰依令大祀散齋四日致齋三日中祀散齋三日致齋二日小祀散齋二日致齋一日散齋之日齋官書理事如故夜宿於家正寢不宿正寢者一宿咎五十一宿加一等其無正寢者於當家之內餘齋房內宿者亦無罪皆不得預穢惡之事故禮云三日齋一日用之猶恐不敬致齋者兩宿宿本司一宿宿祀所無本司及本司在皇城外者皆於郊社太廟宿齋

若不宿者一宿杖九十一宿加一等通上散齋故云
各加一等中小祀者謂社稷日月星辰岳鎮海瀆帝
社等為中祀司中司命風師雨師諸星山林川澤之
屬為小祀從大祀以下犯者中祀減大祀二等小祀
減中祀二等故云各遞減二等

注凡言祀者祭享同餘條中小祀準此

疏義曰依祠令在天稱祀在地為祭宗廟名享今直
舉祀為例故曰凡言祀者祭享同餘條中小祀準此

但在中祀有犯皆減大祀二等小祀有犯皆減中祀二等謂下條大祀在散齋弔喪問疾盜律盜大祀神御物之類本條無中小祀罪名者準此遞減

大祀散齋弔喪

諸大祀在散齋而弔喪問疾判署刑殺文書及決罰者笞五十奏聞者杖六十致齋者各加一等

疏義曰大祀散齋四日並不得弔喪亦不得問疾刑謂定罪殺謂殺戮罪人此等文書不得判署及不得

決罰杖笞違者笞五十若以此刑殺決罰事奏聞者杖六十若在致齋內犯者各加一等中小祀犯者各遞減二等

祭祀有事於園陵

諸祭祀及有事於園陵若朝會侍衛行事失錯及違失儀式者笞四十

謂言辭謾罵坐立怠慢乖衆者乃生

疏義曰稱祭祀者享亦同及有事於園陵謂謁陵等事若朝會謂百官朝參集會及侍衛祭祀之事行事

失錯及違失儀式者笞四十注云謂言辭諠囂坐立怠慢謂聲高諠鬧坐立不正不依儀式與衆乖者乃坐

應集而主司不告及告而不至者各笞五十

疏義曰應集謂祭祀以下及餘事合集之人而主司不頒告令集罪在主司告而不至獨坐不至者故云各笞五十

廟享有喪

諸廟享知有總麻以上喪遣充執事者笞五十陪從者笞三十主司不知勿論有喪不自言者罪亦如之其祭天地社稷則不禁

疏義曰廟享為吉事左傳曰吉禘於莊公其有總麻以上慘不得預其事若知有總麻以上喪遣充執事者主司笞五十雖不執事遣陪從者主司笞三十若主司不知前人有喪者勿論即有喪不自言而冒充執事及陪從者亦如之其祭天地社稷不禁者禮云

唯祭天地社稷為越縉而行事不避有慘故云則不
禁

合和御藥

諸合和御藥誤不如本方及封題誤者醫絞

疏義曰合和御藥須先處方依方合和不得差誤若
有差誤不如本方謂分兩多少不如本方法之類合
成仍題封其上注藥遲駛冷熱之類并寫本方俱進
若有誤不如本方及封題有誤等但一事有誤醫即

合絞醫謂當合和藥者名例大不敬條內已具解訖
料理揀擇不精者徒一年未進御者各減一等監當官

司各減醫一等

餘條未進御及監
當官司並準此

疏義曰料理謂應熬削洗漬之類揀擇謂去惡留善
皆須精細之類有不精者徒一年其藥未進御者各
減一等謂應絞者從絞上減應徒者從徒上減是名
各減一等監當官司依令合和御藥在內諸省省別
長官一人并當上大將軍將軍衛別一人與尚藥奉

御等監視藥成醫以上先嘗除醫以外皆是監當官
司並於已進未進上各減醫罪一等注云餘條未進
御者謂下條造御膳御幸舟船乘輿服御服但應供
奉之物未進御者各隨輕重減一等監當官司及各
減一等故云並準此

造御膳犯食禁

諸造御膳誤犯食禁者主食絞若穢惡之物在食飲中
徒二年揀擇不精及進御不時減二等不品嘗者杖一

百

疏義曰造御膳者皆依食經經有禁忌不得輒造若乾脯不得入黍米中菹菜不得和鼈肉之類有所犯者主食合絞若穢惡之物謂物是不潔之類在食飲中徒二年若揀擇不精者謂揀米擇菜之類有不精好及進御不時者依禮飯齊視春宜溫羹齊視夏宜熱之類或朝夕日中進奉失度及冷熱不時者減罪二等謂從徒二年減二等不品嘗者杖一百謂酸鹹

苦辛之味不品及應嘗不嘗俱得杖一百之罪

御幸舟船

諸御幸舟船誤不牢固者工匠絞

工匠各以所由為首

疏義曰御幸舟船者皇帝所幸舟船謂造作莊嚴不甚牢固可以敗壞者工匠合絞注云各以所由為首明造作之人皆以當時所由人為首

若不整飾及闕少者徒二

疏義曰其舟船若不整頓修飾及在船篙棹之屬所

須者有所闕少得徒二年此亦以所由為首監當官司各減一等

乘輿服御物

諸乘輿服御物持護修整不如法者杖八十若進御乘失者杖一百其車馬之屬不調習駕馭之具不完牢徒二年未進御減三等

疏義曰乘輿所服用之物皆有所司執持修整自有常法不如法者杖八十若進御乘失者依禮授立不

跪授坐不立之類各依禮法如有乖失違法者合杖一百其車馬之屬不調習駕馭之具不完牢者車謂輅車馬謂御馬稱之屬謂羊車及輦等升車則馬動馬動則鑾鳴之類是為調習若不如是或御馬驚駭車輦及鞍轡之屬有損壞各徒二年雖不如法未將進御者減三等

應供奉之物闕乏者徒一年其雜供有關笞五十

疏義曰應供奉之物謂衣服飲食之類但是應供奉

者皆須預備有闕乏者即徒一年雜供有關者謂非尋常應供奉之物可供而闕者笞五十

主司借服御物

諸主司私借乘輿服御物若借人及借之者徒三年非服而御之物徒一年在司服用者各減一等

非服而御謂帷帳几

杖之屬

疏義曰乘輿服御物主司持護修整常須如法若有私借或將借人及借之者各徒三年非服而御之物

謂除服御物之外應供御所用者得徒一年雖非自
借及借人在司服用者各減罪一等服御物徒三年
上減非服而御徒一年上減是為各減一等

注非服而御謂帷帳几杖之屬

疏義曰帷帳几杖之屬者謂筆硯書史器玩等是應
供御所須非服用之物色類既多故云之屬

監當主食有犯

諸監當官司及主食之人誤將雜藥至御膳所者絞

所謂

監當之人
應到之處

疏義曰御厨造膳從造至進皆有監當官司依令主
食升階進食但是雜藥誤將至御膳所者絞雜藥謂
合和為藥堪服餌者若有毒性雖不合和亦為雜藥
百官外膳

諸外膳

謂供百官

犯食禁者供膳杖七十若穢惡之物在食

飲中及揀擇不淨者笞五十誤者各減二等

疏義曰百官常食以上皆官厨所營名為外膳故注

云謂供百官犯食禁者食禁已上解訖若有犯者所
由供膳杖七十穢惡之物謂不淨物之類在食飲中
及揀擇有不淨其所由者得笞五十若有誤失者各
減二等誤犯食禁者笞五十誤揀不淨笞三十

漏泄大事

諸漏泄大事應密者絞

大事謂潛謀討襲及收捕謀叛之類

疏義曰依開訟律知謀反及大逆者密告隨近官司
其知謀反大逆謀叛皆合密告或掩襲寇賊此等是

大事應密不合人知輒漏泄者絞注云大事謂潛謀
討襲者討謂命將誓師潛謀征討襲謂不聲鐘鼓掩
其不備者既有潛謀討襲之事及收捕反逆之徒故
云謀叛之類

非大事應密者徒一年半漏泄於蕃國使者加一等仍
以初傳者為首傳至者為從即轉傳大事者杖八十非
大事勿論

疏義曰非大事應密謂依令仰觀見風雲氣色有異

密封奏聞之類有漏泄者是非大事應密合徒一年
半國家之事不欲蕃國聞知若漏泄於蕃國使者加
一等合徒二年其大事縱漏泄於蕃國使亦不加至
所漏泄之事以初傳者為首首謂初漏泄者傳至者
為從謂傳至罪人及蕃使者其間展轉相傳大事者
杖八十非大事者勿論非大事雖應密而轉傳之人
並不坐

玄象器物

諸玄象器物天文圖書識書兵書七曜歷太乙雷公式
私家不得有違者徒二年

私習天文者亦同

其緯候及論語識

不在禁限

疏義曰玄象者玄天也謂象天為器其以經星之文
及日月所之道轉之以觀時變易曰玄象著明莫大
於日月故天垂象聖人則之尚書云在璇璣玉衡以
齊七政天文者史記天官書云天文日月五星二十
八宿等故易曰仰則觀於天文圖書者河出圖洛出

書是也識書者先代聖賢所記未來徵祥之書兵書
謂太公六韜黃石公三略之類七曜歷謂日月五星
之歷太乙雷公式者並是式名以占吉凶者私家皆
不得有違者徒二年若將傳用言涉不順者自從造
祿言之法私習天文者謂非自有書轉相習學者亦
得二年徒坐緯候及識者五經緯尚書中候論語識
並不在禁限

稽緩制書

諸稽緩制書者一日笞五十

騰制勅符移之類皆是

一日加一等

十日徒一年

疏義曰制書在令無有程限成案皆云即日行下稱
即日者謂百刻內也寫程通計符移關牒滿二百紙
以下給二日程過此以外每二百紙以下加一日程
所加多者摠不得過五日其赦書計紙雖多不得過
三日軍務急速皆當日並了成案及計紙程外仍停
者是為稽緩一日笞五十注云騰制勅符移之類謂

奉正制勅更騰已出符移關解刺牒皆是故言之類
一日加一等計六日杖一百十日徒一年即是罪止
其官文書稽程者一日笞十三日加一等罪止杖八十
疏義曰官文書謂在曹常行非制勅奉抄者依令小
事五日程中事十日程大事二十日程徒以上獄案
辨定須斷者三十日程其通判及勾經三人以下者
給一日程經四人以上給二日程大事各加一日程
若有機速不在此例機速謂軍機急速不必要準案

程應了不了亦準稽程法除此之外皆準事稽程者
一日笞十三日加一等罪止杖八十

放制書施行違者

問答一

諸被制書有所施行而違者徒二年失錯者杖一百

失錯

謂失其旨

疏義曰被制書謂奉制有所施行而違者徒二年若非故違而失錯旨意者杖一百

問曰條云被制書施行而違者徒二年未知勅及奏

抄得罪同否

答曰上條稽緩制書注云騰制勅符移之類皆是即明制勅之義輕重不殊其奏抄御親畫聞制則承旨宣用御畫不輕承旨理與制書義同

受制妄誤

諸受制忘誤及寫制書誤者事若未失笞五十已失杖七十轉受者減一等

疏義曰謂承制之人忘誤其事及寫制書脫剩文字

并文字錯失事若未失者謂未失制書之意合答五十已失謂已失事意而施行合杖七十轉受者減一等若宣制忘誤及寫制失錯轉受者雖自錯誤為非親承制勅故減一等未失其事合答四十事若已失合杖六十故云轉受者減一等

唐律疏義卷九

欽定四庫全書

唐律疏義卷十

唐 長孫無忌等 撰

職制中 九一十九條

制書誤輒改定

諸制書有誤不即奏聞輒改定者杖八十官文書誤不請官司而改定者笞四十知誤不奏請而行者亦如之輒飾文者各加二等

疏義曰制書有誤謂旨意參差或脫剩文字於理有失者皆合覆奏然後改正施行不即奏聞輒自改定者杖八十官文書謂常行文書有誤於事改動者皆須請當司長官然後改正若有不請自改定者笞四十知制書誤不奏知官文書誤不請依錯施行亦如之制書誤得杖八十官文書誤得笞四十依公式令下制勅宣行文字脫誤於事理無改勲者勘檢本案分明可知即改從正不須覆奏其官文書脫誤者詔

長官改正輒飾文字者各加二等謂非動事修飾其
文制書合杖一百官文書合杖六十若動事自從詐
增減法

上書奏事犯諱

諸上書若奏事誤犯宗廟諱者杖八十口誤及餘文書
誤犯者笞五十

疏義曰上書若奏事皆須避宗廟諱有誤犯者杖八
十若奏事口誤及餘文書誤犯者各笞五十

即為名字觸犯者徒三年若嫌名及二名偏犯者不坐

嫌名謂若禹與雨丘與區二名謂言微不言在言在不言微之類

疏義曰普天率土莫匪王臣制字立名輒犯宗廟諱者合徒三年若嫌名者則禮云禹與雨謂聲嫌而字理殊丘與區意嫌而理不別及二名偏犯者謂複名而單犯並不坐謂孔子母名徵在孔子云季孫之憂不在顓臾即不言徵又云杞不足徵即不言在此色既多故云之類

上書奏事誤

諸上書若奏事而誤杖六十口誤減二等

口誤不失事者勿論

疏義曰上書謂書奏特達奏事謂面陳有誤者杖六十若口誤減二等合笞四十若口奏雖誤事意無失者不坐

上尚書省而誤笞四十餘文書誤笞三十

誤謂脫剩文字反錯失者

疏義曰上尚書省而誤者謂內外百司應申尚書省而有文字脫剩及錯失者合笞四十餘文書誤者謂

非上尚書省凡_是官文書誤者合笞三十

即誤有害者各加三等

有害謂當言勿原而言原之當言千疋而言十疋之類

疏義曰上書奏事誤有害者合杖九十上尚書省誤有害者合杖七十餘文書誤有害者合杖六十是名各加三等注云有害謂當言勿原而言原之當言千疋而言十疋之類稱之類者自須以類求之類例既多事非一端假有犯罪當言原之而勿原當言勿原而言原之承誤已行決及原放訖者此即當條雖有

罪名所為重者自從失出入論不可直從有害加三等

若誤可行非上書奏事者勿論

可行謂案省可知不容有異議當言甲申而言

甲申之類

疏義曰上尚書省以下雖誤案驗可行者皆不坐可行者謂案驗其狀省察是非不容更有別議當言甲申之日而言甲申之日如此之類是案省可知雖誤皆不合罪

事應奏而不奏

諸事應奏而不奏不應奏而奏者杖八十應言上而不
言上雖奏上不待報而行亦同不應言上而言上及不由所管而越
言上應行下而不行下及不應行下而行下者各杖六

十

疏義曰應奏而不奏者謂依律令及式事應合奏而
不奏或格令式無合奏之文及事理不須聞奏者是
不應奏而奏並合杖八十應言上者謂合申上而不

言上注云雖奏上不待報而行亦同謂事合奏及已
申上應合待報者皆須待報而行若不待報而輒行
者亦同不奏不申之罪若據文且奏且行或申奏知
不須待報者不當此坐不應言上者依律令及格式
不遣言上而輒言上及不由所管而越言上者假謂
州管縣都督管州州縣事須上省皆須先申所管州
府不申而越言上者并事應行下而不行下不應行
下而行下者謂應出符移關牒刺而不出行下不應

出符移關牒刺而出行下者各杖六十

事直代判署

諸公文有本案事直而代官司署者杖八十代判者徒
一年亡失案而代者各加一等

疏義曰公文謂在官文書有本案事直唯湏依行或
奏狀及符移關解刺牒等其有非應判署之人代官
司署案及署應行文書者杖八十若代判者徒一年
其亡失案而代者各加一等代署者杖九十代判者

徒一年半此皆謂事直而代者若有增減出入罪重者即從重科依令授五品以上畫可六品以下畫聞代畫者即同增減制書其有制可字侍中所注止當代判之罪

受制出使不返

諸受制出使不返制命輒干他事者徒一年半以故有所廢闕者徒三年餘使妄干他事者杖九十以故有所廢闕者徒一年越司侵職者杖七十

疏義曰受制勅出使事訖皆須返命奏聞若不返命更干預他事者徒一年半以故有所廢闕者徒三年餘使謂非制使妄干他事者杖九十以故有所廢闕者徒一年越司侵職者謂設官分職各有司存越其本局侵人職掌杖七十其受三后及皇太子令出使不返命得罪依減制勅一等

匿父母夫喪

問答二

諸聞父母若夫之喪匿不舉哀者流二千里喪制未終

釋服從吉若忘哀作樂

自作遣人等

徒三年雜戲徒一年即

遇樂而聽及參預吉席者各杖一百

疏義曰父母之恩昊天莫報荼毒之極豈若聞喪婦人以夫為天哀籲父母聞喪即須哭泣豈得擇日待時若匿而不即舉哀者流二千里其嫡孫承祖者與父母同喪制未終謂父母及夫喪二十七月內釋服從吉若忘哀作樂注云自作遣人等徒三年其父卒母嫁及為祖後者祖在為祖母若出妻之子並居心

喪之內未合從吉若忘哀作樂自作遣人等亦徒三年雜戲徒一年樂謂金石絲竹笙歌鼓舞之類雜戲謂擣蒲雙陸彈碁象博之屬即遇樂而聽謂因逢奏樂而遂聽者參預吉席謂遇逢禮晏之席參預其中者各杖一百

聞期親尊長喪匿不舉哀者徒一年喪制未終釋服從吉杖一百大功以下尊長各遞減二等卑幼各減一等疏義曰期親尊長謂祖父母曾高父母亦同伯叔父

母姑兄姊夫之父母妾為女君此等間喪即須舉發
若匿不舉哀者徒一年喪制未終謂未踰期月釋服
從吉者杖一百大功尊長匿不舉哀杖九十未踰九
月釋服從吉杖八十小功尊長匿不舉哀杖七十未
踰五月釋服從吉杖六十總麻尊長匿不舉哀笞五
十未踰三月釋服從吉笞四十其於卑幼匿不舉哀
及釋服從吉各減當色尊長一等出降者謂姑姊妹本
服期出嫁九月若於九月內釋服從吉者罪同期親

尊長科之其服數止準大功之月餘親出降準此若有殤降為七月之類亦準所降之月為服數之限罪依本服科之其妻既非尊長又殊卑幼在禮及詩此為兄弟即是妻同于幼

問曰聞喪不即舉哀於後擇日舉訖事發合得何罪答曰依禮斬衰之哭往而不返齊衰之哭若往而返大功之哭三曲而偯小功緦麻哀容可也準斯禮制輕重有殊聞喪雖同情有降殺期親以上不即舉哀

後雖舉訖不可無罪期以上從不應得為重若大功
從不應得為輕小功以下哀容可也不合科罪若未
舉事發者各從不舉之坐

又問居期喪作樂及遣人作律條無文合得何罪

答曰禮云大功將至辟琴瑟鄭注云亦所以助哀又
云小功將至不絕樂喪服云古者有死於室中者即
三月為之不舉樂況乎身服期功心忘哀戚或遣人
作樂或自奏管絃既玷大猷湏加懲誡律雖無文不

合無罪從不應為之坐期喪從重杖八十大功以下從輕笞四十總麻卑幼不可重於釋服之罪

府號官稱犯名

諸府號官稱犯祖父名而冒榮居之祖父母父母老疾無侍委親之官即妄增年狀以求入侍及冒哀求仕者

徒一年

謂父母喪禫制未除及在心喪內者

疏義曰府有正號官有名稱府號者假若父名衛不得於諸衛任官或祖名安不得任長安縣職之類官

稱者或父名軍不得作將軍或祖名卿不得居卿任之類皆須自言不得輒受其有貪榮昧進冒居此官祖父母父母老疾委親之官謂年八十以上或篤疾依法合侍見無人侍乃委置其親而之任所妄增年狀以求入侍者或末年八十及本非篤疾乃妄增年八十及篤疾之狀及冒哀求仕者謂父母之喪二十五月大祥後未滿二十七月而預選求仕從各府號官稱以下合處徒一年注云謂父母喪禫制未除但父

母之喪法合二十七月二十五月內是正喪若釋服求仕即當不孝合徒三年其二十五月外二十七月內是禫制未除此中求仕名為冒哀合徒一年若釋去禫服而求仕自從釋服從吉之法及在心喪內者謂妻子及出妻之子合降其服皆二十五月內為心喪

若祖父母父母及夫犯死罪被囚禁而作樂者徒一年半

疏義曰祖父母及夫犯死罪被囚禁而子孫及妻妾作樂者以其不孝不義虧數特深故各徒一年半

指斥乘輿

諸指斥乘輿情理切害者斬

言議政事乖失干涉乘輿者上請

非切害

者徒二年

疏義曰指斥謂言議乘輿原情及理俱有切害者斬注云言議政事乖失而因涉乘輿者上請謂論國家

法式言議是非而因涉乘輿者與指斥乘輿情理稍異故律不定刑名臨時上請非切害者徒二年謂語雖指斥乘輿而情理非切害者處徒二年

對捍制使而無人臣之禮者絞

因私事鬪
競者非

疏義曰謂奉制勅使人有所宣告對使拒捍不依人臣之禮既不承制命又出拒捍之言者合絞注云因私事鬪競者非謂不涉制勅別因他事私自鬪競或雖因公事論競不干預制勅者並從毆詈本法

驛使稽程

諸驛使稽程者一日杖八十二日加一等罪止徒二年
疏義曰依令給驛者給銅龍傳符無傳符處為紙券
量事緩急注驛數於符契上據此驛數以為行程稽
此程者一日杖八十二日加一等罪止徒二年

若軍務要速加三等有所廢闕者違一日加役流以故
陷敗戶口軍人城戍者絞

疏義曰軍務要速謂是征討掩襲報告外境消息及

告賊之類稽一日徒一年十一日流二千里是為加三等有所廢闕者謂稽遲廢闕經畧掩襲告報之類違一日加役流稱日者須滿百刻為由驛使稽遲遂陷敗戶口軍人衛士募人防人一人以上及諸城戍者絞若臨軍對寇告報稽期者自從乏軍興之法驛使以書寄人

諸驛使無故以書寄人行之及受寄者徒一年若致稽程以行者為首驛使為從即為軍事緊急而稽留者以

驛使為首行者為從

有所廢闕者從前條

其非專使之書而便寄

者勿論

疏義曰有軍務要速或追徵報告如此之類遣專使乘驛齎送文書無故謂非身患及父母喪者以所齎文書別寄他人送之及受寄文書者各徒一年若致稽程謂行不充驛數計程重于徒一年者即以受書行者為首驛使為從此謂常行驛使而立罪名即為軍事緊急報告征討掩襲救援及境外消息之類而

稽留罪在驛使故以驛使為首行者為從注云有所廢闕者從前條謂違一日加役流以故陷敗戶口軍人城戍者絞其非專使之書謂非故遣專使所齎之書因而附之其使人及受寄人並勿論

文書應遣驛

諸文書應遣驛而不遣驛及不應遣驛而遣驛者杖一百若依式應須遣使詣闕而不遣者罪亦如之

疏義曰依公式令在京諸司有事須乘驛及諸州有

急速大事皆合遣驛而所司乃不遣驛非應遣驛而所司乃遣驛若違者各杖一百又依儀制令皇帝踐阼及加元服皇太后加號皇后皇太子立及赦元日刺史若京官五品以上在外者並奉表疏賀州遣使餘附表此即應遣使詣闕而不違者亦合杖一百故云罪亦如之

驛使不依題署

諸驛使受書不依題署誤詣他所者隨所稽留以行書

稽程論減二等若由題署者誤坐其題署者

疏義曰文書行下各有所詣應封題署者具注所詣
州府使人乃不依題署誤詣他所因此稽程者隨所
稽留準上條行書稽留之程減二等謂違一日杖六
十二日加一等罪止徒一年若有軍務要速者加三
等有所廢闕者從加役流上減二等徒二年半以故
有所陷敗亦從絞上減二等徒三年若由題署者誤
謂元題署者錯誤即罪其題署之人驛使不坐

增乘驛馬

諸增乘驛馬者一疋徒一年一疋加一等

應乘驛驢而乘馬者減一

等主司知情與同罪不知情者勿論

餘條驛司準此

疏義曰依公式令給驛職事三品以上若王四疋四品及國公以上三疋五品及爵三品以上二疋散官前官各遞減職事官一疋餘官爵及無品人各一疋皆數外別給驛子此外須將典吏者臨時量給此是令文本數數外剩取是曰增乘一疋徒一年一疋加

一等應乘驛驢而乘驛馬者又準駕部式六品以下
前官散官衛官省司差使急速者給馬使廻及餘使
並給驢即是應乘驢之人而乘馬各減增乘馬罪一
等主司知情與同罪者謂驛馬主司知增乘驛馬及
知應乘驢而乘馬等情者皆與乘者同罪不知情者
勿論餘條驛司準此者謂枉道及越過齎私物之類

乘驛馬枉道

問答一

諸乘驛馬輒枉道者一里杖一百五里加一等罪止徒

二年越至他所者各加一等

謂越過所詣之處

經驛不換馬者

杖八十

無馬者不坐

疏義曰乘驛馬者皆依驛路而向前驛若不依驛路別行是為枉道越至他所者注云謂越過所詣之處假如從京使向洛州無故輒過洛州以東即計里加枉道一等經驛不換馬至所經之驛如不換馬者杖八十因而致死依廐牧令乘官畜產非理致死者備償無馬者不坐謂在驛無馬越過者無罪因而致死

者不償

問曰假有使人乘驛馬枉道五里經過反覆往來便經十里如此犯者從何科斷

答曰律注枉道本慮馬勞又恐行遲於事稽廢既有往來之理亦計十里科論

乘驛馬齎私物

諸乘驛馬齎私物

謂非隨身衣仗者

一斤杖六十斤加一等

罪止徒一年驛驢減二等

餘條驛驢準此

疏義曰乘驢馬者唯得齋隨身所須衣仗衣謂衣被之屬仗謂弓刀之類除此之外輒齋行者一斤杖六十十斤加一等罪止徒一年驛驢減二等謂一斤笞四十罪止杖九十餘條驛驢準此者謂稽程枉道之類諸條驛驢得罪皆準馬減二等

長官使人有犯

諸在外長官及使人於使處有犯者所部屬官等不得即推皆須申上聽裁若犯當死罪留身待報違者各減

所犯罪四等

疏義曰在外長官謂都督刺史折衝果毅鎮將縣令
關監等長官及諸使人於使處有犯者所部次官以
下及使人所詣之司官屬並不得輒即推鞠若無長
官次官執魚印者亦同長官皆須先申上司聽裁若
犯當死罪謂據糾告之狀合死者散留其身待上報
下違者各減所犯罪四等留身者印及管鑰付知事
次官其銅魚仍留擬勘勅符雖復留身未合進納

用符節事訖

諸用符節事訖應輸納而稽留者一日笞五十二日加一等十日徒一年

疏義曰依令用符節並由門下省其符以銅為之左符進內右符在外應執符人有事行勘皆奏出左符以合右符所在承用事訖使人將左符還其使若向他處五日內無使次者所在差專使送門下省輸納其節大使出即執之使還亦即送納應輸納而稽留

者一日笞五十二日加一等十日徒一年雖更違日
罪亦不如其傳符通用紙作乘驛使人所至之處事
雖未訖且納所司事了欲還然後更請至門下送輸
既無限日行至即納違日者既非銅魚之符不可依此
科斷自依紙券加官文書稽罪一等其禁苑門符及
交巡魚符若木契等於餘條得減罪二等輸納稽遲
者準例亦減二等若本契應發兵者同上符節之罪

公事應行稽留

諸公事應行而稽留及事有期會而違者一日笞三十
三日加一等過杖一百十日加一等罪止徒一年半

疏義曰凡公事應行者謂有所部送不限有品無品
而輒稽留及事有期會謂若朝集使及計帳使之類
依令各有期會而違不到者一日笞三十三日加一
等過杖一百十日加一等罪止徒一年半但事有期
限者以違限日為坐無限者以付文書及部領物後
計行程為罪

即公事有限主司符下乖期者罪亦如之若誤不依題署及題署誤以致稽程者各減二等

疏義曰公事有限與上文事有期會義同上文謂在下有違此文謂主司下符乖期者罪亦如之並同違期會之罪若使人不依題署錯詣他所及由曹司題署有誤而致稽程者各減二等謂違一日笞三十減二等笞十罪止徒一年半減二等各合杖一百

唐律疏義卷十

欽定四庫全書

唐律疏義卷十一

唐 長孫無忌等 撰

職制下

九一十七條

奉使部送顧寄人

諸奉使有所部送而顧人寄人者杖一百闕事者徒一
年受寄顧者減一等

疏義曰奉使有所部送謂差為綱典部送官物及囚

徒畜產之屬而使者不行乃顧人寄人而領送者使人合杖一百闕事者謂於前事有所廢闕合徒一年其受寄及受顧者不闕事杖九十闕事杖一百故云減一等

即綱典自相放代者笞五十取財者坐贓論闕事者依寄顧闕事法仍以綱為首典為從

疏義曰或綱獨部送而放典不行或典自領行而留綱不去此為自相放代笞五十受財者坐贓論其闕

事及不關事并受財輸財者皆以綱為首典為從假
有兩綱兩典一綱一典取財代行一綱一典與財得
住與財者坐贓論減五等縱典發意亦以綱為首典
為從取財者坐贓論其贓既足彼此俱罪仍合沒官
其受顧者已減使罪一等不合計贓科罪其贓不徵
若監臨官司將所部典行放取物者並同監臨受財
之法不同綱典之罪即雖監臨元止一典放住代行
者亦同綱典之例

長吏輒立碑

諸在官長吏實無政迹輒立碑者徒一年若遣人妄稱已善申請於上者杖一百有賊重者坐贓論受遣者各

減一等

雖有政迹而自遣者亦同

疏義曰在官長吏謂內外百司長官以下臨統所部者未能導德齊禮移風易俗實無政迹妄述已功崇飾虛辭諷諭所部輒立碑頌者徒一年所部為其立碑頌者為從坐若遣人妄稱已善申請於上者杖一

百若虛狀上表者從上書詐不實徒二年有贓重者
坐贓論謂計贓重於本罪者從贓而斷受遣者各減
一等各謂立碑者徒一年上減申請於上者杖一百
上減若官人不遣立碑百姓自立及妄申請者從不
應為重科杖八十其碑除毀
注雖有政迹而自遣者亦同

疏義曰官人雖有政迹而自遣所部立碑或遣申請
者官人亦依前科罪若所部自立及自申上不知不

遣者不坐

有所請求

諸有所請求者笞五十

謂從主司求曲法之事即為人請者與自請同

主司許

者與同罪

主司不許及請求者皆不坐

已施行者各杖一百

疏義曰凡是公事各依正理輒有請求規為曲法者

笞五十即為人請求雖非已事與自請同亦笞五十

主司許者謂然其所請亦笞五十故云與同罪若主

司不許及請求之人皆不坐已施行謂曲法之事已

行主司及諸求之者各杖一百本罪仍坐

所枉罪重者主司以出入人罪論他人及親屬為請求者減主司罪三等自請求者加本罪一等

疏義曰所枉重者謂所司得囑請枉曲斷事重於一百杖者主司得出入人罪論假如先是一年徒罪囑請免徒主司得出入徒罪還得一年徒坐他人及親屬為請求者減主司罪三等唯合杖八十此則減罪輕於已施行杖一百如此之類皆依杖一百科之若

他人親屬等囑請徒二年半罪主司曲為斷免者他人等減三等仍合徒一年如此之類減罪重於杖一百者皆從減科若身自請求而得枉法者各加所請求罪一等科之

即監臨勢要

勢要者雖官卑亦同

為人囑請者杖一百所枉重者

罪與主司同至死者減一等

疏義曰監臨者謂統攝案驗之官勢要者謂除監臨以外但是官人不限階品高下唯據主司畏懼不敢

乖違者雖官卑亦同為人囑請曲法者無問行與不行許與不許但囑即合杖一百主司許者笞五十所枉重於杖一百與主司出入坐同主司據法合死者監臨勢要合減死一等

受人財請求

諸受人財而為請求者坐贓論加二等監臨勢要準枉法論與財者坐贓論減三等

疏義曰受人財而為請求者謂非監臨之官坐贓論

加二等即一尺以上笞四十一足加一等罪止流二
千五百里監臨勢要準枉法論即一尺以上杖一百
一疋加一等罪止流三千里無祿者減一等與財者
坐贓論減三等罪止徒一年半若受他人之財許為
囑請未囑事發者止從坐贓之罪若無心囑請詭妄
受財自依詐欺科斷取者雖是詐欺與人終是求請
其贓亦合追沒其受所監臨之財為他司囑請律無
別文止從坐贓加二等罪止流二千五百里即重於

受所監臨若未囑事發止同受所監臨財物法

若官人以所受之財分求餘官元受者併贓論餘各依已分法

疏義曰謂有官之人初受有事家財物後減所受之物轉求餘官初受者併贓論餘官各依已分法假有判官受得枉法贓十足更有兩官連判各分二足與之判官得十足之罪餘官各得二足之坐二人仍並為二足之從其有共謀受財分贓入已者亦各依已

分爲首從之法其中雖有造意及以預謀不受財者
事若枉法止依曲法首從論不合據贓爲罪如曲法
罪輕從知所部有犯法不舉劾減罪人罪三等科之
有事以財行求

諸有事以財行求得枉法者坐贓論不枉法者減二等
即同事共與者首則併贓論從者各依已分法

疏義曰有事之人用財行求而得枉法者坐贓論不
枉法者謂雖以財行求官人不爲曲判者減坐贓二

等即同事共與者謂數人同犯一事歛財共與元謀
歛者併贓為首仍倍論其從而出財者各依已分為
從

監主受財枉法

諸監臨主司受財而枉法者一尺杖一百一疋加一等
十五疋絞

疏義曰監臨主司謂統攝案驗及行案主典之類受
有事人財而曲法處斷者一尺杖一百一疋加一等

十五足絞

不枉法者一尺杖九十二足加一等三十足加役流

疏義曰雖受有事人財判斷不為曲法一尺杖九十
二足加一等三十足加役流

無祿者各減一等枉法者二十足絞不枉法者四十足
加役流

疏義曰應食祿者具在祿令若令文不載者並是無
祿之官受財者各減有祿一等枉法者二十足絞不

枉法者四十疋加役流

有事先不許財

諸有事先不許財事過之後而受財者事若枉準枉法論事不枉者以受所監臨財物論

疏義曰官司推劾之時有事者先不許物事了之後而受財者事若曲法準前條枉法科罪既稱準枉法不在除免加役流之例若當時處斷不違正理事過之後而與之財者即以受所監臨財物論

受所監臨財物

諸監臨之官受所監臨財物者一尺笞四十一足加一等八足徒一年八足加一等五十足流二千里與者減五等罪止杖一百

疏義曰監臨之官不因公事而受監臨內財物者計贓一尺以上笞四十一足加一等八足徒一年八足加一等五十足流二千里與財之人減監臨罪五等罪止杖一百

乞取者加一等強乞取者準枉法論

疏義曰乞取者加一等謂非財主自與而官人從乞者加受所監臨罪一等以威若力強乞取者準枉法論有祿無祿各依本法其因得相送而更強乞取者既是一事分為二罪以重法併滿輕法若是頻犯及二人以上之物仍合累併倍論

因使受送饋

諸官人因使於使所受送饋及乞取者與監臨同經過

處取者減一等

糾彈之官不減

即強乞取者各與監臨罪同

疏義曰官人因使於所使之處受送饋財物或自乞取者計贓準罪與監臨官同經過處取者謂非所詣之處因使經歷之所而取財者減一等糾彈之官不減者謂職合糾彈之官人所畏懼雖經過之處受送遺乞取及強乞取者各與監臨罪同

貸所監臨財物

問答一

諸貸所監臨財物者坐贓論

後訖未上亦同餘條取受及相犯並準此

若百

日不還以受所監臨財物論强者各加二等

餘條强者準此

疏義曰監臨之官於所部貸財物者坐贓論注云授訖未上者若五品以上據制出日六品以下據書訖並同已上之法餘條取受及相犯謂受所監臨及毆詈之類故言準此若百日不還為其淹日不償以受所監臨財物論若以威力而強貸者各加二等謂百日內坐贓論加二等滿百日外從受所監臨財物上加二等注云餘條强者準此謂如下條私役使及借

馳騾驢馬之類强者各加二等但一部律內本條無
強取罪名並加二等故於此立例所貸之物元非擬
將入已雖經恩免罪物尚徵還縱不經恩償訖事發
亦不合罪為貸時本許酬償不同悔過還主故也若
取受之贓悔過還主仍減三等恩前費用準法不徵
貸者赦後仍徵償訖故聽免罪

若賣買有剝利者計利以乞取監臨財物論強市者笞
五十有剝利者計利準枉法論

疏義曰官人於所部賣物及買物計時估有剝利者計利以乞取監臨財物論強市者笞五十謂以威若力強買物雖當價猶笞五十有剝利者計利準枉法論

問曰官人遣人或市司而為市易所遣之人及市司為官人賣買有剝利官人不知情及知情各有何罪答曰依律犯時不知依凡論官人不知剝利之情據律不合得罪所為市者雖不入已既有剝利或強賣

卷十一
買不得無罪從不應為準官人應坐之罪百杖以下
所市之人從不應為輕笞四十徒罪以上從不應為
重杖八十仍不得重於官人應得之罪若市易已訖
官人知情準家人所犯知情之法

即斷契有數違負不還過五十日者以受所監臨財物
論即借衣服器翫之屬經三十日不還者坐贓論罪止
徒一年

疏義曰官人於所部市易斷契有數仍有欠物違負

不還五十日以下依雜律科負債違契不償之罪滿
五十一日以受所監臨財物論即借衣服器翫之屬
者但衣服器物品類至多不可具舉故云之屬借經
三十日不還者坐贓論罪止徒一年所借之物各還
主

役使所監臨

諸監臨之官私役使所監臨及借奴婢牛馬騾驢車
船碾磴邸店之類各計庸賃以受所監臨財物論

疏義曰監臨之官私役使所部之人及從所部借奴婢牛馬駝騾驢車船碾磴邸店之類稱奴婢者部曲客女亦同各計庸賃之價人畜車計庸船以下準賃以受所監臨財物論强者加二等其借使人功計庸一日絹三尺人有强弱力役不同若年十六以上六十九以下犯罪徒役其身庸依丁例其十五以下七十以上及廢疾既不任徒役庸力合減正丁宜準當鄉庸作之價若準價不充絹三尺即依減價計贓科

罪其價不減者還依丁例

即役使非供已者

非供已謂流外官及
雜任應供官事者

計庸坐贓論罪

止杖一百其應供已驅使而收庸直者罪亦如之

供已
求輸

庸直者

不坐

疏義曰非供已謂流外官者謂諸司令史以下有流
外告身者雜任謂在官供事無流外品為其合在公
家驅使故得罪輕於凡人不合供官人之身計庸坐
贓致罪一尺笞二十一疋加一等罪止杖一百其應

供已驅使者謂執衣白直之類止合供身驅使據法不合收庸而收庸直亦坐贓論罪止杖一百故云亦如之注云供已求輸庸直謂有公案者不坐別格聽收庸直者不拘此例

若有吉凶借使所監臨者不得過二十人人不得過五日其於親屬雖過限及受饋乞貸皆勿論

親屬謂總麻以上及大功

以上婚姻之家餘條親屬皆準此

疏義曰吉謂冠婚或祭享家廟凶謂喪葬或舉哀及

殯殮之類聽許借使監臨部內所使撻數不得過二十人每人不得過五日其於親屬雖過限謂親屬別於數限外驅使及受饋餉財物飲食或有乞貸皆勿論親屬謂本服總麻以上親及大功以上親共為婚姻之家並通受饋餉借貸役使依法無罪餘條親屬準此者謂一部律內稱親屬處悉據本服內外總麻以上及大功以上共為婚姻之家故云準此

營公廨借使者計庸賃坐贓論減二等即因市易剝利

及懸欠者亦如之

疏義曰借使所監臨奴婢牛馬車船碾磑邸店之類
為營公廨使者各計庸賃坐贓論減二等即為公廨
市易剝利及懸欠其價不還者亦計所剝及懸欠坐
贓論減二等故云亦如之

監臨受供饋

諸監臨之官受猪羊供饋

謂非生畜

坐贓論强者依強取監

臨財物法

疏義曰監臨之官於所部內受猪羊供饋者即是殺
訖始送故注云謂非生者舉猪羊為例自餘禽獸之
類皆是各計其所直坐贓論強取者依強取監臨財
物法計贓準枉法論其有酒食瓜果之類而受者亦
同供饋之例見在物徵還主若以畜產及米麵之屬
饋餉者自從受所監臨財物法其贓沒官

率斂監臨財物

諸率斂所監臨財物饋遺人者雖不入已以受所監臨

金
卷十一
財物論

疏義曰率歛者謂率人歛物或以身率人以取財物
饋遺人者雖不入已併倍以受所監臨財物論若自
入者同乞取法既是率歛之物與者不合有罪其物
還主

監臨家人乞借

問答一

諸監臨之官家人於所部有受乞借貸役使賣買有剩
利之屬各減官人罪二等官人知情與同罪不知情者

各減家人罪五等

疏義曰臨統案驗為監臨注云謂州縣鎮戍折衝府等判官以上摠為監臨自餘唯據臨統本司及有所案驗者此等之官家人於其部內有受財乞物借貸役使賣買有剩利之屬者各減官人身犯二等若官人知情者並與家人同罪其不知情者各減家人罪五等謂準身自犯得減七等

其在官非監臨及家人有犯者各減監臨及監臨家人

金匱要略卷之八
卷十一
一等

疏義曰在官非監臨者謂非州縣鎮戍折衝府判官
以上其諸州叅軍事及小錄事於所部不得常為監
臨此為在官非監臨若有事在手便為有所案驗即
是監臨主司無所案驗者有所受乞借貸役使賣買
及假貸有剝利之屬知情不知情各減監臨之官罪
一等家人有犯亦減監臨家人罪一等

問曰州縣鎮戍折衝府判官以上於所部總為監臨

自餘唯據臨統本司及有所案驗者里正坊正既無官品於所部內有犯得作監臨之官以否

答曰有所請求及枉法不枉法律文皆稱監臨主司明為監統案驗之人不限有品無品但職掌其事即名監臨主司其里正坊正職在驅催既無官品並不同監臨之例止從在官非監臨各減監臨之官罪一等

去官受舊官屬

諸去官而受舊官屬士庶饋與若乞取借貸之屬各減

在官時三等

謂家口未離
本任所者

疏義曰舊官屬謂前任所僚佐士庶謂舊所管部人
受其饋送財物若乞取借貸之屬謂賣買假賃有剩
利役使之類各減在官時三等並謂家人未離本任
所者其家口去訖受饋餉者律無罪名若其乞索者
從因官挾勢乞索之法

挾勢乞索

諸因官挾勢及豪強之人乞索者坐贓論減一等將送

者為從坐

親故相與者勿論

疏義曰或有因官人之威挾恃形勢及鄉閭首望豪右之人乞索財物者累倍所乞之財坐贓論減一等將送者為從坐謂領豪右人等乞索者雖不將領而飲財送者並為從坐若強乞索者加二等注云親故相與者勿論親謂本服總麻以上及大功以上婚姻之家故謂素是通家或欽風若舊車馬不吝縞紵相


貽之類者皆勿論

稱律令式

諸稱律令式不便於事者皆須申尚書省議定奏聞若不申議輒奏改行者徒二年即詣闕上表者不坐

疏義曰稱律令及式條內有事不便於時者皆須辯明不使之狀具申尚書省集京官七品以上於都座議定以應改張之議奏聞若不申尚書省議輒即奏請改行者徒二年謂直述所見但奏改者即詣闕上

表論律令及式不便於時者不坐若先違令式而後
奏改者亦徒二年若違重者自從重斷



唐律疏義卷十一